

Sch'i va per daners datti tempo

DA CLAU DERMONT

■ **La Svizra è disada ch'i va plaun en la politica. Nagina naziun dal mund ha duvrà uschè lung da dar a las dunnas ils medems dretgs politics sco als umens – dal 1848 fin al 1971. Gea, en l'Appenzell Dadens schizunt fin il 1991. Er uschiglio n'èsi betg da quintar che las instanzas politicas hajan prescha da midar il status quo en favur da svilup.** I dat paucs exempels nua ch'igl è il cuntrari. In è dentant gist actual: Il 2016 ha la dretgira europeica decidì ch'i na dettia nagina basa legala per observar persunas privatas sch'ellas duessan emprovar da cugliunar assicuranzas. E tuttenina è tut i spertezza. La nova disposiziun en la lescha d'assicuranzas socialas ha survegni in proceder da VIP, enstagl da far pass per pass en in tempo bernais sco usità hai stuì ir spert.

Fin uss dastgavan las assicuranzas socialas statalas, en spezial quella d'accident e d'invaliditad, en cas da dubi observar persunas che duessan avoir fatg cugliunarias. Cun la nova disposiziun vegn quai er schlargià sin las cassas da malsaus. Assicuranzas han uschia ina massa pussaivladads d'emprovar da

spagnar daners. Encunter questa disposiziun vegn il mument rimnà sutscriptziuns per in referendum. Critigada vegn surtut la pussaivladad da pudair observar senza decisiun d'ina dretgira quai che dat libertads ad interpresas da violar la sfera privata senza vegnir controlladas.

Per las assicuranzas è l'interess finanzialegit grond da francar ina tala disposiziun en la lescha – e cun ina massa represchents a Berna en il parlament che sesan en cussegl d'administraziun dad assicuranzas han els er access direct al proceder da legislaziun. Tgi che ha ils daners vegn da guardar per ils agens interess, pari, e da metter sin il chau il process usità.

Quest cas regorda a la dumonda averta dals daners en la politica svizra che n'enconuscha naginas regulaziuns concernent finanziair partidas e politichers. In tractament da VIP tras politicis e politichers ch'èn liads finanziaimain vi da questas interpresas e che profiteschans sezs finanziaimain da lur decisiuns vales en mintga cas en blers pajais sco corrupziun.

L'autur è politolog